


C.D "God Sons" sumamente bunita



Mi a ricibi e CD aki varios dia pasa, pero ta ayera mi a tuma mi tempo pa scuche cu atencion y mi a bin haye sumamente bunita. Un CD cu composicionnan agradable pa scucha, mensahenan di alabanza masha bunita, solistanan cu interpretacionnan sublime y un oro fantastico di voz y cu variacionnan di voz.

Ta trata di e CD "God Sons" cu cantantenan Jairo Evertsz, Demis Thielman, Milangelo Semeleer, Kennesy Montero, Sannin Daou, Maiky Oliva, Emmanuel Henriquez, Dave Martinus, Sherwin Howell, Miguelangelo Wanga, Chendell Beamont, y Gregory Goedgedrag.

Locual pa mi tabata nobo y cu mi a keda encanta cune, ta e mensahe como prome grabacion y e mensahe como di 10 grabacion riba e CD.

El a cuminza cu introduccion di reverendo Father Sydney M. Jacob di Holy Cross Anglican Church di Aruba.

El a cuminza na splica cu "semper nos a siña pa pidi Dios pa perdona nos faltanan, mescos cu nos ta perdona esnan cu a falta cu nos. Laga nos tuma e curashi y ban cerca nos Tata cu ta na cielo, cu ta para cla pa ricibi nos peticionnan."

E mensahe di Reverendo pastoor Jairo Maduro, cu ta e di 10 grabacion, ta menciona entre otro: "Den

Evangelio di San Juan, Hesus a yega di duna un contesta cla, ora nan a

puntra si e ta rey dii verdad. Y El a declara, si mi ta rey; mi a nace y bin na mundo pa un motivo, testigua na favor dii berdad. El a yama su mes rey, un rey cla pa sirbi, cla pa scucha, cuta duna nos speranza y cu no ta laga nos warda pa un contesta, pa un favor."

E di dos grabacion cu ta e prome cancion, ta "Señor honrami bo pordon" cu ta menciona entre otro: "Señor honra mi bo pordon. Mi ta pidibo Señor pordonami un biaha mas pero e biaha aki di curazon. Señor mustrami bo pordon, mi ta pidibo Señor lagami mira e berdad cu luz di Dios."

E ta wordo sigui pa e cancion "Mi kier alababo Señor". Esaki ta menciona "Señor mi no ta digno di yega na bo trono, mi sa cu mi a peca, pero awor mi ta arrepenti".

E di 4 grabacion ta ritmo salsa, "Danki, Señor" cu ta masha agradable y hopi bunita den musica y palabranan. "Danki pa a dunami un bida nobo. Danki pa a dunami bo pordon. Danki pa a dunami e bendicion, danki Hesu Cristo".

Despues ta sigui e grabacion titula "Dushi e caminda di Señor". E cancion aki tin ritmo di reggae y ta menciona entre

otro: "mas mi busca, mas mi ta haya di mi Cristo Jesus. Amor na abundancia. Dushi ta e caminda di Señor. Dushi ta e obranan di Señor. Dushi ta e presencia di Señor. Dushi ta e amor di nos Señor".

Dii 6 y dii 9 grabacion ta "Nos ta ruman". E prome ta e version R&B y e di dos ta e version Cadans, y tur dos masha bunita. E ta bisa entre otro: "Den oracion nos ta canta pa Señor pa dune tur honor, alabanza y adoracion. Señor a crea nos pa alabanza di su gloria. El a manda Cristo Hesus cu a muni riba cruz. Cristo ta nos ruman den espirito y berdad. Cu n'E nos ta uni den oracion como ruman, Nos ta ruman, yama pa proclam'E. Danki na Señor cu nos ta uno den Su amor".

Otro cu ta hopi bunita tambe ta e bachata "Señor no hay nadie como Tu" cu ta sigui menciona tambe "Tu eres maravilloso. Tu eres muy bondadoso. Gradecido estoy por tu misericordia".

E di ocho cancion ta na ingles, "Glory to the Lord" tin de ritmo soca estilo carnaval cu hisa man y repara pa Señor. E ta menciona entre otro na un manera simpel: "Hands up in the air, glory to the Lord. Get Ready for the Lord".

Y e ultimo cancion ta "Tu eres Rey" cu ta despues di e mensahe di reverendo Jairo Maduro.

E cancion "Tu eres rey", tin bunita coro y combinacionnan di varios voz. E ta menciona entre otro cu "Tu eres Dios siempre te adorare. Tu reinas con autoridad, soberano Dios, Tu eres Rey."

Esaki ta un CD cu ta cuadra cu tur pensamiento religioso Cristian y ta un CD cu por sinta scucha cu hopi placer. Gregory Goedgedrag na 592-5129, Sannin Dao na 593-0115, Jairo Evertsz na 561-1719 y Demis Thielman na 741-1974, ta e personanan na unda por tuma contacto relaciona cu e grabacion

sumamente bunita aki. Un pabien sigur mi tin cu manda pa e grupo di hobennan aki pa e CD di Bon Mensahe aki y di hopi balor pa hopi di nos. Hobennan musico y

cantantenan conoci y popular cu a laga comercialismo un banda pa bini cu un CD estilo gospel cu sigur lo mishi cu curazon di nan fanaticonan.

Juby Naar.